

四庫全書

集部

欽定四庫全書

文苑英華卷五百六十四

宋

李昉等

編

賀祥瑞四

爲朝臣賀涼州瑞石表一首

代皇太子賀石龜負圖表一首

爲納言姚璿等賀瑞石龜表一首

爲納言姚璿等賀瑞石表一首

百寮賀瑞石表一首

賀天尊瑞石及雨表一首

爲宰相賀武威郡石化爲麴表一首

爲涇州李使君賀慶山表一首

爲許智仁奏懷州黃河清表一首

賀秦州河清表一首

中書門下賀滑州黃河清表一首

賀河清表一首

中書門下賀醴泉表一首

賀櫟陽醴泉表一首

爲朝臣賀涼州瑞石表

上官儀

貞觀十七年

臣元嘉等言臣聞太陽含宇天之命也德水呈文地之符也是知光膺寶曆非幽贊無以享鴻名對越兩儀非神物何以昌丕緒故有玄龜負卦繇表軒功朱鳥啣書兆彰姬錄非聖人之撫運孰能與於此乎伏惟皇帝陛下慶韞上元與天皇而合德祥凝太始體耀魄以齊明作周錫胤王業本於水翼生商降祉寶祚基於玉筐然

後樞電効神皇虹授彩彤雲澹景標映龍顏瑞火流光
呈發鳥跡由是凝圖作極握紀中天化洽九垓恩錦

疑作

綿八表功成戢武散駢服於桃園業定弘文單正朔於

昌海輯五玉而彰禮備陳萬舞而表樂成至德至仁垂

拱巖廊之上乃聖乃神遠奠廟堂之下憲文王而授立

招天獎於夢齡象漢帝以登賢選仁明於剡闕國重曜

而臨照家萬宇而永貞是以淹歲亢陽離輝昇而玄澤

降春疇罕闕震方建而年稼登受冊之辰隨輕輪而翊

佳氣夏絃之月接飛蓋而吐芝英郡國陳孝德之符煙

浮一作生霧集縣道奏明靈之貺電擊雷奔豈與夫日至

月書可同年而語矣伏見涼州都督李襲譽表奏昌松

瑞石合百一十字文曰高皇海出多子李久唐書五行志作元

王八千唐書作十年太平天子李世民王唐書無王字千年太子

李治書燕山人唐書有士字樂太國主尚注諤唐書作汪諫獎文

仁邁千古大王五王七王十王唐書無王字鳳尾唐書作毛

才子七佛八菩薩及上果佛田天子武文唐書作文武貞觀

昌大聖延四方上下萬治忠孝爲善

八字唐書作上不治示孝仙戈八爲

善其文不次者略而不載敕遣禮部郎中柳逞馳驛檢

覆並同所奏皆素文玉潔若瓊樹之華滋玄質碧鮮擬

翠微之遠色雖復霞燦冠岳暉鏤誅

疑於介丘海鏡浮

山昭列名於稽岳方茲秀麗曾何足云臣等歷選皇猶

稽河圖於東序詳觀帝錄披冊府於西崑媧燧以前不

可得而知矣義農以降乃考載而言焉若乃馬遷堯壇

鳳御虞冊麟遊吐字頗涉劉邦葉靈爲文纔稱病已玄

石降徵於典午赤伏錫命於炎精皆髣髴如神徵文見
意或傍通以取證或索隱以求端猶且動色當年光華
曩志矧茲天冊顯發靈瑞頌聖德之欽明通史筆之揚
堯典述國祚之悠永倍龜策之卜周年追美先朝衍軒
丘之德姓式昭儲后邁釣臺之有光豈非天鑒孔明聖
尤大者祥彌著靈心至察德加厚者祚逾長是用越契
超繩光前振古績無與二慶溢登千臣等自省微生幸
霑鴻造荷重光之煦育觀三才之宅心雀躍無以表其

誠鳧趨不足勝其喜臣無任悅豫之至

代皇太子賀石龜負圖表

崔融

臣某言臣聞虞舜五帝也夏禹三王也應歷數則星昴告期度水土則河精授象故知至誠上感無往而不通神道曲成有來而先見伏惟天皇運斗極平太階漏德澤於海河散皇明於日月煙雲郁郁鳥獸蹒蹒百寶用而銀甕滿五穀豐而丹甑出化之遠及陰陽不測之謂神德之廣被天地無名之曰道嵩高維嶽洛陽下都此

焉符理之所古則先靈之地伏見洛州牧相王所奏嵩
山下頂封禪壇側掘得石龜負圖篆文一百六十字者
臣亟聞其言矣昔者黃轅東省河獻龍書蒼頡南巡洛
呈龜字古猶今也其若茲乎夫惟氣挾風霜文含星象
玉經山上匪藉傍求銀丹池中居然暗發頌國祚之長
久孕育於萬八千年歌卜筮之叶從牢籠於六十四卦
况復高臨泰室近控洛壇佇降王者之封常有君來之
望由是神工不召若鐫金鏤之名天意潜彰似刻銀繩

之篆豈與玉龜在泰山之上莫覩其祥石龜出吳江之
右空傳其跡可同年而語哉臣才謝元良忝當儲貳三
靈睠命預聞東序之圖萬國心歡願奉南山之壽無任
悅豫之至謹遣某官奉表稱慶以聞臣某誠歡誠喜云
云

爲納言姚璿等賀瑞石龜表 李嶠

臣某言伏見衡州所進瑞石形似龜頂上有文曰大周
并有乾坤卦字左邊有王武九千字又有水火金木土

字各依其方北邊無有井字臣等詳觀靈字伏觀奇文

事實非常理同神仙

疑

首列大周文

疑作

字表元首之

尊左有王武之名明左契之執合乾坤之兩卦分金木

之五行五行展轉而不窮兩卦周流而無極井以養物

而知渥

疑作泥

澤之下覃石以補天乃顯貞堅而上列將

以九千之寶祚嗣七百之鴻基兆發靈心事符嘉運況

復名爲玄武叶國姓而呈休出自炎方迎嚮明而發祉

神祇之命受托於四靈感應之符實超於千載臣等叨

延恩獎屢覩

一作觀

嘉祥喜抃之情實百常品無任慶躍

之至謹奉表陳賀以聞謹言

爲納言姚璿等賀瑞石表

臣某等言伏見瑞石有文曰武帝李彰好生臨國永保
吉昌伏惟陛下受命旻穹降靈宗祏複棟重簷之禮嚴
配昭升五刑九辟之科平反宥恤故能使三精孚德七
廟垂祥頻降靈符屢彰潛祉好生臨國寔開琬琰之文
永保吉昌顯示貞堅之錄隆萬代之遐筭曠千齡而不

聞臣等叨沐恩私謬當樞近親覲休寶相趨抃躍無任
嘉慶之至謹奉表稱賀以聞仍請出示百寮并錄付史
館

百寮賀瑞石表

臣某等言臣聞高明博臨無遠不應正直潛感雖幽必
通伏惟皇太后陛下慶發曾沙業隆大寶以至明當宗
社之寄以至聖合乾坤之德荷三葉之休光承五行之
厯紀平秩庶政大亨羣物冠帶遐荒之域天福日臨閭

閭富壽之氓禮變樂和液露霑洽休徵昭顯用能上披
乾象下發坤珍吐川之靈秘開神之韞匱伏見雍州永
安縣人唐同泰於洛水中得瑞石一枚上有紫脉成文
曰聖母臨人永昌帝業八字臣等忝窺靈迹駭瞻珍圖
俯仰殊觀相趨動色竊惟聖德奉天遞爲先後神道助
教相因發明陛下對越昭升欽若扶揖允塞人祇之望
寔當天地之心所以幽贊嘉兆傍通景貺且人稱同泰
縣實永安姓氏將國號玄符土地與石文明應表裏潛

會樞機冥發明宴坐之逾昌驗皇基之永泰則自然之
無朕不測之謂神非夫道格昊蒼德充幽顯豈能發何
言之微旨臻不召之靈物考皇圖於金冊搜瑞典於瑤
編則有蟲蠹成文魚鱗吐匣丹書集於昌戶綠錯薦於
堯壇或詞隱密微或氣藏識緯莫究天人之際罕甄神
秘之心未有昭聖毓靈發祥隤祉明白顯著燭曜暉光
若斯之盛者也且夫道導洛䟽津卜瀍經宇是開帝王之
宅實爲龜書之泉伯禹以致孝鬼神九疇天錫陛下以虔

恭顧託八篆靈開超萬祀而同存歷百百疑而罕逮况
乎陰陽景測朝市天臨號令施於四海機衡動於萬國
靈心叶贊景業會昌薦希代之鴻寶獲非常之嘉應固
可以明裡太寶禮秩介丘副神宗之廼睠答上玄之蕃
祉臣等遇偶休明榮參簪笏千年且暮邀逢累聖之期
百辟歌謳喜屬三靈之慶無任鳬藻踴躍之至謹表詣
闕陳賀以聞

賀天尊瑞石及雨表

臣聞大悲握契汲引之數盈千玄聖垂機感現之瑞不一隨緣應俗或作儒童降跡通凡常爲長者然則前佛皆同一字可通疑作道非道理兩名至矣哉不可得而稱

也伏惟天冊金輪聖神皇帝陛下功成塵劫跡御金輪萬姓樂推百靈欣戴如來備記昔避天女之宮菩薩降生遂坐人王之國臣等一昨伏見四疑岳雲臺觀道士

奏稱御像瑞石大妙至極天尊一鋪創造聖容未施五色宿昔之頃畫續自然不加之分宛同神化七十二相

合而成體八十一好散而成章披絳雲之室闢明霞之
館千乘億騎浮空而下九仙五老步虛而來羽抱錦帔
風搖雲起龍文而鳳章日縣而月綴威儀有睟侍衛無
聲坐疑龍漢之遊何必仙山之會自非陰陽不測變化
無方憑法匠之威靈假神功之動用其孰能與於此中賀
臣等又聞先天後天聖德合於無象欲雨而雨玄契通
於不言日者王室屋一作屈聞炎方在候陛下乘朱輅駕
赤騶歷太陽之中道居明堂之左个百神受職萬國來

朝既配帝而嚴裡亦統天而布政是時也慈雲結慶甘露流香微風蕭然纖塵不起凡百在宥動色相歡咸以爲天者萬人之本物有不霑於澤者則仰皇天而望之有不覃於惠者則籲告而請之更祈洪澍輒聞流潦俄而油雲族晚覆雙闕而朝濟膏雨及私浹三川而校疑下郊原吐潤品彙霑蘇麥壘纖莖已擢兩岐之秀黍田香粒方滋合穎之苗凡在群生不勝幸甚然後知御雲臺而占繇幸洛陽而錄囚盖其眇少曾何髣髴臣等幸

忝簪笏預睹珍符惟德洞冥即叶元皇之化惟靈薦福
長延梵帝之尊拊蹈之情倍百恒品無任鳬藻之至

爲宰相賀武威郡石化爲麴表

孫逖

天寶
三載

臣等伏見王倕奏武威郡番禾縣嘉瑞鄉天寶山周回
五六里石化爲麴在近村間及諸郡部落自今載正月
以來取食甘美益人又按圖經貞觀九年鳳凰集於此
故名嘉瑞鄉其天寶山在此鄉界伏以神道設教變化

無方聖人爲心感通必應陛下仁霑動植澤及生靈故
得地不藏寶石變爲麴既資人食又濟邊廩成熟自因
於道氣艱難不待於農功豈來麴之足方何雨粟之能
喻况山符聖號用彰於萬壽鄉表瑞石允迪於前烈殊
祥叶應景福攸臻臣等忝侍軒墀倍深慶悅無任抃躍
之至謹奉表陳賀以聞

爲涇州李使君賀慶山表

崔

融

垂拱二年

臣某等言某日奉某月詔書新豐縣有慶山出曲赦縣

囚徒改新豐爲慶山縣賜天下酺三日凡在含生孰不

慶幸中賀微臣詳窺海記博訪山經方丈蓬萊之疑作人

跡所蓬到層

增作

城玄圃道家之妄說伏惟皇太后陛下

應天順人正位凝命中外咸一陰陽以和嘉木四方而

平春露草三旬而候月冲恩浹洽嘉貺駢闐當雍州之

福地在漢都之新邑聖渚潛開神峯欵見政平而湧自

蕩於雲日德茂而生非乘於風雨游龍蜿蜿疑呈八卦

之圖鳴鳳嗷嗷似發五音之奏仙蠶曳繭美稼抽芒一

人有合於天心百姓不知其帝力方驗鎮星垂象山萌
輔地之徵太歲加年水兆載坤之應天人交際影響合
符雷雨既作喜氣冲於三象鍾石以陳歡心動於萬物
臣幸忝簪帶濫守藩隅不獲馳蒼闕而拜手望紫庭而
繼足殊祥踵至寶算無疆厚賚傍霑群生一有之幸甚
不任悚踊之至謹遣某官奉表以聞

爲許智仁奏懷州黃河清表

臣智仁言臣聞德水清漪詩人以之興頌濁流澄鏡大

聖於是登朝伏惟皇帝陛下道叶二儀功超萬古上玄
降祉變孟津於淶波厚載呈祥發榮光於翠浼臣以去
月得河內縣申云自太平村已下三十餘里河水變清
各遂淺深泠然徹底鱗介之族無所藏形一作養藏謹自依
極此句疑息同其狀又嵩高維岳形入清流少室奇峯叅

差具寫謹按易坤靈圖曰聖人受命瑞見於河伏見涼
州玄石式昭靈命臣部黃河應時清澈天禎地貺既符
易象之文聖祚河清暗合靈圖之義古人歎其難俟臣

今乃得親觀身體太平之風目擊會昌之瑞無任悅豫

之至

唐書五行志涼州立石在十七年懷州河清乃十六年當考

賀秦州河清表

臣聞崇高不極之謂天廣博無涯之謂地若乃參天地之玄化代覆育之神功者在聖人乎故能俯同五情恩浸八紘允膺千載仁霑萬代明靈之貺自我所招幽顯合符斯其效矣伏惟皇帝陛下家六合馭三光推明允之一心置於天下之腹用狗齊之四日招於萬物之

情蜻蟲鼻卵之所安猶懷夕惕輿頌藟莠之瞽說尚迴
天睠其所愛育者多矣而況於鰥寡孤獨乎其所容納
者衆矣而況於公侯卿士乎至若削平宇宙混一華夷
乃武也致疑教會昌樂新禮創乃文也穆巖廊以凝睇
調風雨於絕恨疑乃聖也運埏埴以裁成動陰陽而不
測乃神也體茲四霽侔彼兩儀神物之來蓋惟常理伏
見秦州刺史表今月某黃河水復清深淺澄映百有餘
里清自龍門之下驗登期以御天波及萬春之卑表無

疆以彌壽臣聞道之所格者弘則靈之所感者大德之
所包者厚疑則地之所應者深是以千祀登期自古
歎其難遇一歲之內祚聖人而再請求諸典墳竟無倫
匹在於明世絕後光前宜其上答靈心升中告禪金聲
一作舉玉振合百神於介丘玉輅朱輪副萬國之翹首則
普天幸甚何其樂歟臣等越自下才欣逢上德致百王
之不致聞億載之未聞舞蹈之深實百恒品

中書門下賀滑州黃河清表

權德輿

臣某等言今日內侍朱希顏奉宣進止示臣鄭滑觀察使姚南仲所奏今月一日至六日白馬縣界三十里黃

河清者伏以道

集作導

自積石出於崑崙乃建靈源之封

特視上公之禮克符昌運必降殊祥伏惟陛下聖澤感

通休徵

集作貞

疊委惟此濁質化爲清瀾國典所書是稱

大瑞詩曰俟河之清人壽幾何歎其不可得而見也今則白馬之津三十里所澄澈如練綸綺成文一邦幼艾

共觀嘉慶乃寓經界式彰永寧昔秦號水德徒推厭勝
漢紀河平苟安決溢神功幽贊獨表清時足以薦諸宗
廟書之史策臣等忝集作登樞近獲奉休明無任欣抃

踴躍之至謹奉表陳賀以聞臣某等誠歡誠抃頓首謹

言

貞元十四年
五月十五日

賀黃河清表

臣某言臣得進奏官狀伏承河陽奏汜水西界從洛口
黃河清一百六十里又橫海軍奏界內河清澄澈分明

者臣聞聖人在上天下和平風雨時若則海波不蕩黃
河清夫土所以載水水所以利物天意鍾土德之道疑
開水瑞之華符我上聖祥於下土中賀伏惟睿聖文武
皇帝陛下蹈十聖之原軌陳一王之大法垂衣裳以朝
萬國舞干羽而來四夷平泰階於天纏偃師節於靈臺
故得濁波渾渾千載一清長瀾浩浩百里如鏡氣新天
宇光澈地脉仰分萬象之法中涵千聖之德初澄海裔
表陛下橫恩波於海上再清洛口助陛下鋪文明於土

中二十八日北陛下告成之日也百六十里期陛下得
聖之數也臣謬承分閫之寄叨榮持節之權生當海宴
之年幸識河清之日未奉明詔不敢擅離軍府詣闕隨
公卿蹈舞明庭下情無任西望踴躍之至

中書門下賀醴泉表

常 袞

大曆二年

臣等伏以西京櫟陽縣有泉水於平地湧出潔誠飲者
痼疾咸痊稽之圖牒是曰醴泉臣聞和氣上感湛恩下
浹則有休徵以彰至化近在雨金之地特啟莢泉之瑞

無源獨湧平地湧流當神明之積高表陰陽之不測其
氣香潔其味甘醇抱華清而盪邪資靈化以除穢積年
之疾一飲皆愈挈瓶而至重跡相望日以萬計酌而不
竭齊莊之誠益厲神達之效愈彰伏惟陛下弘父母之
深仁納黎元於壽域感此靈液助其生成疾苦假除天
昏不作勿藥有喜愛人斯甚可以見天地之心可以明
帝王之德昔唐堯至聖光武中興沛然發祥千歲一覩
啟我昌運居然合符鴻休無疆天下慶幸臣等謬司近

密喜倍常情無任忻慶之至

賀櫟陽醴泉表

獨孤及

臣等言伏見京兆尹李勉奏櫟陽縣有醴泉出飲之者
痼疾皆愈臣聞王者澤周庶類則神降百祥天地之心
去人不遠陛下厚德載物與坤同符以善利人如水潤

下故厚

集作后

土獻瑞湧泉療疾靈源酌而不竭況痼飲

而皆痊勿藥之喜萬人是賴仰窺天意豈不以是彰陛
下之德施乎不然何衆庶顒顒強名聖水彼丹甌

集作井

朱草白麟赤鴈徒稱太平之瑞未聞功施於人方之聖
泉豈喻神異臣等無任喜慶之至

文苑英華卷五百六十四

欽定四庫全書

文苑英華卷五百六十五

宋 李昉等 編

賀祥瑞五

賀杭州等龍見表一首

賀隰州等龍見表一首

賀常州龍見表一首

賀富平縣龍見表一首

皇太子賀白龍見表一首

賀麟跡表一首

賀東川麟見表一首

爲魏州成使君賀白狼表一首

中書門下賀文丹國獻白象表一首

賀白鼠表一首

中書門下賀河陽獲白兔表一首

賀白鹿表一首

賀白野鷄表一首

中書門下賀邢州獲白雀白山鵲表一首

中書門下賀興慶池白鷗鷀表一首

爲百官賀白鳥表一首

賀杭州等龍見并慶雲朱草表

許敬宗

臣某言臣聞休氣降祥與聖人而合契明靈之貺候昌
辰而咸通自五帝寂寥九皇悠緬神龍逃夏后之世一
去莫追景靈歇伊帝之朝千齡不嗣逮乎茲日翔驟來
儀天道去人何其交際伏惟皇帝陛下化龍疑作隆乾棟

施厚大鑪馭三光以照臨摠萬寓而光宅雖復荒陬之
遠億兆之多一物不安則宵衣載惕四夷有罪則納隍
興歎日者東師作梗類農皇之夙沙交河阻兵等軒后

之獾獫元戎所輜

疑

大漢申湧醴之奇齊斧裁加昌海

效靜波之慶既而西師獻捷東岱希封日告禎機歲登
靈稼表裏提福彰外平而內成幽顯合符叶天意於人
事伏見杭州刺史潘求仁表稱於錢唐縣界見青龍一
又江州刺史左難當稱尋陽縣界見青龍二又得汝州
及沂州狀稱所部各有慶雲見又延州刺史席辨稱臨
貞縣界有朱草生臣等以管窺天之意若曰青者方色
宜順動以東巡龍者帝閑可駢駟於大輅非煙五色雜

雲旗於翠華朱草三英代靈芽於芳籍豈非以茲幽旨
警寤皇情促升中以奉高輿臣等自慶一生預逢千載
雖復仲尼將聖恨出圖之未期夷吾大賢嗟比翼之難
致羣臣庸昧竊譬古人幸遇休明勝之多矣披祥溢目
觀祕驚心庇大厦以相歡荷施生而罔謝無任鳬藻之
至

賀隰州等龍見表

臣某等言臣聞狗齊御極玄滬

疑作
彪

表其麝鳳文思則

天黃河貺其龍馬是知利充於物乾坤應而合符行出
於身明靈感而幽贊伏惟皇帝陛下道登邃古功濟懷
生發軔升陟墾災出漢書除害坐玉帳振金鼓運天機掩
區縣然後散服林塞偃伯靈臺羈左袵以長纓同文軌
於遐裔禮高年以執酒醕闕

通孝敬於神明猶且昧旦丕顯凝旒庶政臨草纓而罪
已削金諜以勝殘化洽風移禮脩樂備是以百靈効職
四海夷波物不疵癘人無眚穰烟雲動色星辰叶契儀

雙舸之駿奔莫飛甘之清醴黃金掞彩紫玉摘英粵自
離陸之前其事無得而聞義軒之降書契可畧而詳焉

未有茂實鴻名若斯光大休徵美端疑作瑞如此感通伏

見隰州刺史表裏疑異度表稱某月日青龍見隰州

城北大四五圍長八九丈謹按瑞應圖云青龍水之精

乘雨而下不處深泉王者有仁則出竊惟升雲騰霧孔

氏論而不知凌江負舟疑作負舟大禹對而猶懼豈如丹文

綠錯驟簡皇情或躍且飛亟遊明世蒸哉懿已絕名闕

考歷觀圖將何取譬臣等撫躬私抃鼓腹相歡忽以

微生同沾

一作沾天

大賚逢物覩之昌運覽天祚之禎符開

闢以來未聞斯遇千齡一會猶謂比肩何幸之深親承旦暮驚雀相慶實百常情不勝悅豫之至

賀常州龍見表

臣某言臣聞聖人作而萬物覩神靈滋而百寶用是以飛龍御天五雲勝彩潛龍涵池四海夷波軒帝由其受圖太昊以之爲紀莫不游泳宮沼駢服輿鑾玉牘丹文

與會昌而契合金繩綠錯候休明而降祥伏惟皇帝陛下道極上玄功成下武重光煥錄體睿凝圖至德充於兩儀大孝刑于四海

一作表

網地張天之謂武制禮裁樂

之謂文惟幾惟深運神樞而不測無爲無事致璇厯於平分故能網絡九重琢磨三代普天之下用至道而不知懷生之倫荷大造而無謝於是湛恩洋溢休氣氤氲上格天下漏泉不私其照日月爲之揚彩不愛其道鱗介所以騰文神物有徵於斯不忒伏見常州別駕終文

英表稱所部晉陵縣尉信都叔卿等七人以六月十三日於縣城南雲雨之際見有青龍長數十丈大八九圍久之乃沒謹按熊氏瑞應圖曰有仁聖君子在位不肖斥退則見惟皇作極感而遂通惟德動天遠無不應是使四靈嘉瑞叶千祀之登期五色榮光高萬古之靈貺方且以茲嘉祉造類雲亭頌其徽猷歸功清廟豈與夫魚生露鼎蔡上荷心竹葦凝珠晨昏合璧校其優劣何可同年而語哉臣等運偶明時預聞靈慶不任鳬藻之

至

賀富平縣龍見表

臣某等言臣等歷選前辟皇王之道詳焉遐觀曩載致治之方備矣竊聞垂衣垂拱之世追獯鬻而匪寧乘舟乘橈之期即析支而僅叙堯氏有竄徒謂可封湯禱無徵非合一作能具美道光史冊幽贊禎符合擅鴻名俱爲稱首況以括地成象中天作鏡代玄功而造物叶神化以開祥取譬前脩豈同年而語矣伏惟皇帝陛下受初

或躍嘯命風雲廓彼重昏裁成環晷張維立極不盈少
選之間邁五登三度越千齡之表施生靈於動植日用
者不知混覆燾於華戎航深者忘遠巍巍乎赫赫乎書
契以來未之聞也猶且留神昧旦克念終朝去歲以膏
澤遲時撤八珍而罪已今春以濯枝未降輟萬騎於甘
泉狗物爲心憂勤至矣於是天先致感畝積餘糧聖敬
日躋虛心効祉近得富平縣令獨孤仁宗奏云十二月
一日白龍見又得沂州刺史李道遷狀云去年二月內

景雲出又臣聞之天飛水游洞陰陽而不測雲行雨施
混神妙而無端龍之謂靈義彰於此至乃千年韓疑慶
四和充瑞名叶堯歌色符軒紀卿雲所貺復在於斯陛
下挺睿哲之資納明靈之祐是以冲天宛宛貫六位以
呈祥秘景紛紛亂五章而發彩故能遠安邇肅理定功
成動而弗違告禪展禮闕報功使夫同和之樂與鈞
天而並奏無體之禮對上玄而比隆超出萬古之前獨
立九皇之上道格區宇何其盛歟臣等屬會昌之辰曲

成惠日倏聞嘉瑞再佇升中慶賴之深實兼恒抃不任
鳧藻之至

皇太子賀白龍見表

崔融

臣等言伏見某官等奏稱某月日玉山宮西南王谷上
有白龍見臣聞天地和平聖人所以乘九五帝王符命
神物所以寤黎蒸粵若皇家既高居而遠望於惟史閣
亦舒圖而負璽疑服星辰之冕袞彩奪華蟲建日月之
旂常文騰翠鳳出東方而據木天下知春臨北荒而御

火容光是燭風雨順陰陽和五穀登百寶用豈孫氏所
謂出入應命上下以時無道則處有聖則見矣水火中
星長風季月詳乎戴禮則帝嚳成龍之時校以河圖是
黃軒夢龍之悔裁金別宇挺玉名區宮摸抗殿之基山
接陵陽之路翩翩素翼矯矯白鱗果彩霜封風姿雪操
一作徵鄴城之故事若下神祠探吳郡之遺塵疑過象
兕臣聞感通之效人事可尋嘉瑞之來天心容察地稱
王谷先題王者之名壤號玉山寶北南山之固天皇以

帝出乎震自天鍾有德之期天后以致養乎坤承天得西南之位披圖按謀影響合符漢朝之出在上封特其小者晉國之來從京兆曾何足云唯我后能得之固前王所不逮方使見龍于甸一人繫年月之書豈宜圉龍於池百姓爲朝夕之觀而已臣業謝溫文觀聞絕瑞雖四靈爲畜未足以舞之蹈之而萬國歡心敢忘於美矣盛矣不勝鳧藻之至

賀麟趾表

李嶠

臣某言今月十六日聖上擬檢行安置大像處其夜舊
著大像曜儀院內從南行向北總有八十一麟跡見外
無入處內有出蹤靈貺潛開禎符顯發唯此仁獸獨冠
毛羣識變知機通靈感化悟金輪之欲轉即見殊祥知
玉輦之方遊先呈異跡九九爲數明厯算之無疆濯濯
咸歌見休明之有應五蹄顯五方之會一角彰一統之
符式廣鴻基方弘象教昔有鳳巢軒閣纓冕相趨龍止
堯壇神祇動色豈若祥開紫掖瑞感玄樞發揮萬劫之

符幽贊三天之果美超五籍珍越四靈曠千古而不聞
超九皇而獨遠臣濫承驅策親覲嘉祥欣慶之情實倍
恒品無任抃躍之至謹奉表陳賀以聞伏請頒示天下
錄付史館

賀東川麟見表

張仲素

元和七年

臣某言伏見劔南東川觀察使潘孟陽奏龍州寶華山
中有麟見獨角馬蹄遍身光耀并嘉禾二十二莖至八
十九穗麟見與鹿每來同食各畫圖函盛封進者臣

聞六合同歸則麒麟至天下和一則嘉禾生伏惟陛下
昭事上帝凝情衢室宵興滌慮申旦忘倦大敷至化以
永時雍故得希世之祥應我皇運異質卓犖奇彩光明
顧步幽巖發聞郡國神物自生於聖日靈編徒載其嘉
名况大田之中衆穗斯茂沐以膏澤扇其祥風而後呈
彼珍羣承茲共觝必生長畝之秀以明王者之瑞因緣
所驗鄭重合符有以識上聖之心兆至和之本德超千
古慶洽無疆日月所均無思不服臣等幸覩休異喜萬

恒情無任抃躍之至

爲魏州成使君賀白狼表

崔融

臣某言某月日得所部魏縣申稱得令孟神符謀稱某日得佐吏長壽鄉單守中狀稱隆州長壽兩鄉界有白狼見臣等嘗恐是虛未敢即申因處分諸鄉若有見者輒令繫取某日長壽鄉致仕前游擊將軍上柱國朱佛兒於長壽鄉界內逢白狼馴狎無懼人意遂以繩絡頭繫得隨送者臣謹按瑞應圖云白狼者金狼精也殷湯

時銜鉤入于庭王者仁智明哲即至動準法度即見周
宣王時見而犬戎服伏惟皇帝陛下玄期兆朕靈命氤
氲物類有感而必通符祥不召而總集金精累爍鼓鑄
於陰陽玉糝霜翹騰倚於郊甸應時乃出野心狎而無
驚有道則游貪性馴而不搏亦何必咒豹可履虵虵可
弄者哉徵故事於璇鈴考異聞於玉冊出自神符之縣
顯符命之通神來於長壽之鄉明久長之益壽重以陛
下獨尊三界高視四天身運明哲動循法度既合周王

之時仍彰犬戎之服上玄潛驚佛兒來送天尊若曰陛下養衆生其如二乎善守其忠亦可知矣謹尋令式唯合申臺臣以尊號初加神聰顯應守文不奏恐爽靈心無任懼悚之至謹冒死遣官奉表稱賀以聞其白狼既非常獸臣未敢即放之山野見令佛兒養飼伏聽進止

中書門下賀文丹國獻白象表 常 衮

臣某言今日內侍董秀至宣進止文丹國王來朝并獻白象十一頭者臣聞春秋二百四十年不紀祥瑞而

載異國之朝其在周書亦美西戎之獻蓋重其德化及
遠天下大同也伏惟陛下以至敬事天地以至孝奉
宗祀武功以定大難文德以懷遠人故舊典未載之邦
前王不賓之長聲教所隔言語莫通悠悠南溟幾千萬
里瞻望中國知有聖人踰海而來歷年方至紳疑冒重
阻奔波載馳黃帔飾冠白鍔玩耳伏柔羣象牽置闕前
低徊馴擾稽顙屈膝隨萬國而來庭與百獸而率舞如
知禮樂之節益盛羽儀之容有以彰仁化玄通淳源洽

暢至和大順以兆昌期事軼於軒轅跡超於漢代矣臣等謬塵樞近獲覩鴻休伏請宣付史官光照簡策無任慶抃之至

賀白鼠表

臣某言今日內常侍吳承倩宣恩命示臣咸陽縣所進白鼠臣聞王者將致無疆之休必有非常之應臣竊謂鼠者陰類四夷之象白者金精西方之色以西方陰類受制於近郊得非諸戎有納款之誠中國啟受降之兆

也伏惟陛下俯憂黎獻控馭蠻夷能以禮綏孰云力競而晝伏夜動時擾於封疆乘障安邊尚勞於師旅今天且悔禍戎將感恩方委貢於蠻貊遂呈祥於甸邑干戈既息已有明徵烏雀之來多慙遠瑞臣等忝居近侍獲覩禎符歡抃之誠倍萬恒品

中書門下賀河陽獲白兔表

權德輿

臣某等言今日中使楊明義奉宣進止示臣河陽三城

節度使李元淳所奏今月六日於河陽縣城南社壇獲
白兔者謹按孫氏瑞應圖曰王者加恩耆老則白兔見
又前史所稱多自純孝之本集作感伏惟皇帝陛下誠合

天地孝通神明玄符嘉祉遠近相屬雖集作惟此瑞獸是

稱月精來應昌期皓然雪彩當孟津之壘俯勾龍之壇
邦畿士吏駭視歡賀且自前歲已來中外所列凡在羽
毛之族多呈皎潔之祥今八陵園寢脩復斯畢萬國臣
寮手足相慶盛儀既展靈貺斯臻幽贊素姿若合符契

臣等謬居台鼎倍萬恒情無任慶抃之至伏請宣付史館

謹奉表陳賀以聞

貞元十四年八月二十二日

賀白鹿表

令狐楚

臣某言臣得進奏院狀報中書門下奏賀於醴泉縣建陵栢城獲白鹿一聖敬日躋禎祥荐至臣某謹按孝經援神契曰王者德至禽獸則白鹿見伏惟陛下盛德配天深仁育物和氣交感出爲休徵懿此異獸挺茲奇表在嶠山之側宛是隨仙來魏闕之前如將率舞天下稱述

兆人歡慶昔者周因征伐而獲漢自祭祀而臻比今無
爲宜有慙德臣某幸逢昭代獲覩玄功欣抃之誠倍百
恒品所守有限不獲隨例稱慶闕庭無任屏營踴躍之
至

中書門下賀白野鷄表

臣某言內常侍吳承倩至宣示臣淮南節度使陳少遊
所進白野鷄者臣聞聖法天以布氣天表聖以呈祥皆
啟迪皇猷發揮至理事均影響必在感通伏惟寶應元

聖文武皇帝陛下德合大和化高前古休徵異瑞以月

繫年方啟

疑衍

率舞以來儀豈

疑

重譯

疑

而作貢臣謹按

瑞應圖云王者仁聖旁流四海則見又云祭祀不相踰
宴會衣服有節則見耿介之性自能馴狎綽雜之姿
齷然純素丹立楹檻雪映雕籠時和自叶於禎祥天意實
彰於變化豈越裳之獻獨美於前王而岱宗之精用呈
於今貺必然之應幽贊如斯載表太平之符克明柔遠
之德臣謬參樞近獲覩鴻休慶躍之情倍萬恒品

中書門下賀邢州獲白雀白山鵲表

權德輿

臣某等言今日伏奉宣示昭義軍節度使李元淳所進於邢州獲白雀白山鵲各一者謹按孫氏瑞應圖曰王者奉已儉約尊事耆老則白雀見又晉中興書曰天下安寧則見伏惟陛下純儉成化乾坤合符敬彼黃髮感茲霜毛俗既登於壽域事多驗於祥經用應昌時固無虛月昔神雀效祉乾鵲知來或用以紀年或聞諸往載

豈比山禽叶質靈貺特殊皎潔異姿追飛交映休嘉所
集遐邇同歡臣等忝列台司倍百欣賀無任喜慶之至
謹奉表陳賀以聞

中書門下賀興慶池白鸕鷀表

前人

臣某言伏承陛下以去月九日幸興慶池龍堂爲人祈
雨忽有一白鸕鷀見於池上衆鸕鷀羅列前後如引御
舟明日之夕甘集作雨遂降者伏惟陛下子惠元元躬

勤庶政念切時澤虔於祈禱以陛下如傷之誠上感玄
貺在烈祖發祥之地下降靈禽潔白異姿翻飛成列若

應天意以承宸衷族

集作族

陰雲於一夕灑霈澤於千里

疾均影響慶浹公私昔周致白翟徒稱遐邇

集作遠

漢歌

赤鴈亦薦郊廟豈比今日感於至誠瑞諜所無蒸人何

幸伏望宣付史冊昭示將來臣等備位鼎司倍百懽賀

無任欣慶抃躍之至謹奉表陳賀以聞

貞元十三年四月十二日

爲百官賀白鳥表

令狐楚

臣某等言臣昨二十三日中書宣武軍節度使臣劉彥
佐進白鳥并以鳥及所獻圖示百官臣某伏以殊祥絕
瑞有應斯歸網緼感通難識其朕惟聖德動於皇天
意勤於聖后則必昭彰矜蠭靈物荐臻流行蒂之仁樹
太平之業毛羽遂性禽鳥呈祥臣等中賀臣謹按孫氏
圖云王者宗廟敬則白鳥至又漢成帝時白鳥集於文
武廟黑鳥皆從頗類此圖去年冬十一月履端之始陛
下擁萬國驅百靈祀圓丘封天老前一日已孝享於宗

廟盡敬致美竭力精誠悲感之音動於列辟孝敬之極
通於神明白鳥之來允答醇至書之史冊萬代有詞觀
其素彩皓潔丹雘朱距永霧疑作霜奪色龜龍騰輝參五
雲周禮雖有五雲又疑別用事之嘉祥掩百王之能事臣等叨逢昌
運累沐殊私親覩太陽之精克叶大君之祉歡躍抃舞
手足無從不勝犬馬欣慶之至

文苑英華卷五百六十五

欽定四庫全書

集部

文苑英華卷五百六十八至

詳校官給事中_臣李 臺

助教_臣常循覆勘

總校官進士_臣朱 鈐

校對官中書_臣胡紹基

謄錄監生_臣陳振興

欽定四庫全書

文苑英華卷五百六十六

宋 李昉等 編

賀捷一

自此賀捷表凡三卷英華所編既不以類從又失其年代今各以先後而正之

賀平鄴都表一首

爲納言姚璿等賀破契丹表一首

爲建安王賀破賊表一首

爲常右相賀平賊表一首

賀賊自相誅滅表一首

賀章仇兼瓊克捷表一首

爲宰相賀檀州界破奚賊表一首

爲宰相賀破吐蕃并慶雲見表一首

爲宰相賀九姓斬送突厥首表一首

爲宰相賀匈奴來降表一首

爲宰相賀隴右破吐蕃表一首

李採訪賀收西京表一首

爲江淮都統使賀田神功平劉展表一首

爲江淮都統使奏破劉展兵捷書表一首

爲江東節度使奏破餘姚草賊龔厲捷書表一首

賀袁傜破賊表一首

賀平鄴都表

庾信

臣某言臣聞太山梁甫以來即有七十二代龍圖龜書

之後又已三千餘年雖復制法樹司禮殊樂異至於文

類集籬武落剡木弦弧席卷天下之心包含八荒之志

其揆一矣類聚伏惟皇帝陛下握天樞秉地軸駕馭風

雲驅馳龍虎沉雄內斷不勞謀於力牧天策勇決無待
問於容成是以威風所振烈火之遇鴻毛旗鼓所臨衝
風之卷秋葉竊聞伊洛戎夷幽并僭偽抱圖載籍已歸
丞相之府銜玉繫綬並詣中軍之營百年逋誅遂窮巢
窟三代敵怨俄然掃蕩昔周王賁水之師尚勞再駕軒
轅上谷之戰猶須九伐未有一朝指麾獨決神慮平定
寓內光宅天下二十八宿止餘吳越一星千二百國裁
漏麟洲小水若夫咸康之年四方始定建武之代諸侯

並朝不得同年而語矣雖復八風並唱未足頌其英聲
六樂俱陳無能歌其神武坐釣臺而誓衆如啟繼夏禹
之功入商郊而問罪姬發成周文之志無改之道大孝
也歟當今鹿臺已散傾宮已遣兵藏武庫馬入華山立
明堂之制奏大武之樂盛矣哉上天降休未之有也政
須東南一尉立於比景之南西北一候置於交河之北
然後命東后詔蒼冥衢壇琬碑銀繩瓊檢告厥成功差
無慙德臣忝竊榮幸蒞政東藩不獲躬到闕庭預觀大

慶不勝鳬藻踊躍之至謹遣主簿陪臣曹敏奉表以聞

爲納言姚璿等賀破契丹表

李嶠

證聖二年

臣某等言伏見遼東都督高仇須

英華作頃非

承露布逆賊

孫萬斬

按唐書證聖元年改制契丹首領李盡忠爲盡賊孫萬榮斬英華作榮非

等驅率

凶黨燒逼州城城中出兵與其賊拒戰則有飛廉作氣

回祿揚燄起沙礫而薄天助茲鼙鼓吹煙火而漲日燎

彼鴻毛靈應潛施勇士皆奮遂使妖徒震懾亂轍而塞

旗善戰橫行摧枯而拉朽僵屍蔽於草莽俘馘聚於轅

門善馬咸牧名王且繫無假燒鷄之策而觀其自焚不

勞燧象之師而撲

一作颶

其餘燼又凶渠不逞將竊號而

假名逆黨未悛

一作誅

止挺妖而怙亂或神摧其股或天

厲其身似安國之登車同伯牛之自牖故知高明輔順

正直司僊惟辟好仁與乾坤而合德惟狂樂禍在神鬼

而同誅方省剪滅之期行覲凱旋之奏臣等叨延獎渥

謬奉軒墀抃躍之情實萬恒品無任慶快之至謹奉表

稱賀以聞謹言

爲建安王賀破賊表

陳子昂

臣某言今日日得遼東都督高仇須等日月破逆賊契
丹孫萬斬等一十一陣露布并捉得生口一百人送至
軍前事三軍慶快不勝踴躍臣聞天之所棄雖暴必亡
人之共讎在遠彌戮况凶羯遺醜未及犬羊固作孽以
招誅自辜恩而取滅伏惟陛下威加四海子育百靈集作
是鬼神尚不敢欺集作凶狡豈能逃罪逆賊萬斬等天
奪其魄生自爲殃仇須等謹奉廟謀遠憑國討短兵纔

接群逆銷亡又云反風迴煙燠晴掩日此乃天威潛運
神道密周豈止人謀仰由靈助今盡滅殃病婆固折股

一作婆
目折股

饑災兼至凋弊日滋未加天兵已

集作
應

自糜爛

臣訓勵士馬今日

集作
月

尅行大軍一臨凶寇必殄獻俘

在即拜闕有期預喜承恩不勝慶賀無任抃快之極

爲韋右相賀平賊表

崔融

臣某言伏奉某月日遞敕逆賊等並已傳首都市幕庭
拜受旌門宣告凡預軍司孰不慶悅中賀臣聞惡禽恠獸

有以彰普覆之仁亂臣逆子不能損盛明之德故三監
作難周王未寢於頌聲七國爲災漢帝克臻於刑措伏
惟聖母神皇陛下象天之運法地之安澤浸河海光懸
日月以忠信爲甲冑以慈惠爲干戈所向無前何人不
服舉神兵如電掃破亮黨若冰離數月妖氛一朝清蕩
斯實皇威遠肅聖化傍霑故能市不改肆人皆安堵臣
濫承天澤忝預戎麾聞逆命而憎憤聽臬懸而累抃慶
快之情倍百恒品不任悅豫之至謹附某官奉表稱賀

以聞

賀賊自相誅滅表

張九齡

此篇當在六百三十七卷賀狀門今已移入姑存
其目

賀章仇蕪瓊克捷表

李

邕

開元二十八年

臣邕等言伏見中書門下章仇蕪瓊奏稱吐蕃數萬圍
逼于城皆遵奉九重決勝萬里臣聞雷之震者可以破
山風之威者可以蕩海伏惟陛下允答天地丕應鬼神

吸之而百川却流吹之而萬物倒植是以斲勞貌虎一
掃戎羗高屋用疑於建瓴鋌戈申於破竹豈云懷縣獨
有獲嘉何止絳城復稱聞喜光風動處草樹爲之欣榮
晴天轉時日月爲之融朗臣等分官寄切報國身輕蹈
舞徘徊恐門庭之地窄詠歌踴躍賀邦家之慶深無任
欣悅豁快之至謹奉朝堂奉表陳賀以聞

爲宰相賀檀

一作檀非

州界破奚賊表

孫逖

臣等今月二十五日於易州所奏事陛下顧謂臣曰朝
夕之間諸軍當有捷書至臣等愚淺莫測天心不逾數
日張守珪果奏副將安祿山於檀州界破奚賊擒生斬
級并獲馬計至數千定期不差於晷刻指事有同於符
契聖惟廣運神以知來微妙之言自成於繫象玄通之
術不假於著龜精義難名前古未有臣等何幸親覩明
徵驚喜之誠抃躍交集伏望宣示朝列兼付史官式昭
德音永用垂範無任喜慶之至謹奉表陳賀以聞

爲宰相賀破吐蕃并慶雲見表

前人

臣等比見吐蕃舉國徵兵向二十萬掘壕置柵攻逼定
戎城頃因奉事陛下謂臣等曰吐蕃雖衆當即破亡計
日之間捷書必至昨見皇甫惟明奏破定戎城下吐蕃
賊二十萬衆并斬獲大將論莽布支頭隨狀奉進又初
與賊相遇西風甚急及交鋒之後便至風迴既掃妖氛
兼有慶雲見者臣聞天之討一作罰罪俟盈貫而方誅聖

無不通匪常情之所及伏以一戎凶醜久負恩信敢踰
絕漠來犯邊城舉國興師二十餘萬經時固守八十餘
日蟻聚蛇伏狼顧鴟張據便地之井泉逼懸軍之塹壘
雖逆順曲直本無敵於王師而衆寡安危難預卜於人
事自朝及野能不憂虞陛下神算無方睿謀先覺料此
狂寇必合敗亡決祕策於禁中落奇兵於天下應期撲
滅萬里廓清天聲所振已訢一作脚於四海虜將之首又
懸於北闕事均符契理絕名言况合戰之時則返風破

敵決勝之後則卿雲靄空大塊資其殺氣輪囷表其休

色實惟聖感詎測神功凡在庶寮不勝抃躍况於一作在

臣等倍萬恒品一作情無任慶快之至謹奉表陳賀以聞

爲宰相賀九姓斬送突厥首表

前人
天寶三載

臣等伏見王忠嗣奏九姓拔悉密等斬突厥可汗首送至朔方軍者伏以北虜孔熾其来自久憑險恃遠干紀亂常雖聖德撫和約爲父子之國而野心凶獷不改豺

狼之性既盈稔貫自速天誅頃歲已來頻貽喪敗酋豪
向化雖已歸降默啜迷恩尚爲潛竄苟合餘燼偷安絕
漠陛下聖慮先覺神謀獨斷使其種類自至携離咸革
面於塞垣遂傳首於軍壘以狄攻狄寧勞六月之師有
征無戰豈待三年之克永罷邊圻遂清虜庭斬蚩尤而
莫儔戮防風而何有豈惟率土無外用表於昌期固亦
先天不違更彰於睿算凡曰士庶不勝慶悅況在臣等
倍百恒情無任抃躍之至謹奉表陳賀以聞

爲宰相賀匈奴來降表

臣等伏以匈奴患邊其來自久頃雖朝廷示信約爲父子之國然而戎狄無親常畜豺狼之志陛下聖謀廣運睿略玄通至道昭感神明叶贊不勞一卒不頓一兵使其種落自相携貳今葉護敗亡殞命漠北妻子縲繫爲俘闕下巢傾席卷瓦解雲散萬里無事二庭遂空曠古不賓盡爲臣僕普天所覆皆入封疆諒由負德背恩自速天亡之禍固亦休兵偃甲用彰海晏之期實有無方

之神寧惟不戰之勝求諸載籍所未嘗聞臣等幸遇昌期欣逢大慶忝居近密實倍恒情無任抃躍之至謹奉表陳賀以聞仍望宣付史官兼示中外

爲宰相賀隴右破吐蕃表

臣等先在城中因奏事陛下謂臣等曰朕料至重陽已來諸軍必頻尅捷臣等欽承聖旨詎測神功近者隴右果奏斬獲莽布支并生擒蘇毗王及蠻駕將迴劔南節度使章仇兼瓊又奏西山將士分爲五道破吐蕃城保

鎮柵等四十餘所四鎮節度馬靈察又奏破吐蕃不可
勝數并聞護密識慝等數國共爲邊捍者數旬之間

一作

內三方告捷應如影響合若符契禁暴如武盡決於宸
衷知來似神更超於繫表斬級獲醜陷陣隳城分南方
之五將舉無遺策道西城之諸蕃仍爲外蔽百戰百勝
以夷攻夷高居九重懸料萬里所以彰睿略之天贊知
犬戎之日蹙臣等忝陪巡幸預奉德音踴躍之誠實倍
恒品無任欣慶之至謹奉表陳賀以聞

李採訪賀收西京表

常衮

至德二載

臣聞夏歷其昌羿何逃罪漢維既振莽亦伏誅伏惟皇
帝陛下恢正皇綱光膺帝業日月照其明略雷霆發其
英斷極橫流而方割撲燎火之已焚頃者胡羯亂常嶠
函失守暴殄天物憑陵帝京上皇興避狄之仁陛下有
蒙塵之難賴宸衷果決睿算昭宣憤陵寢之焦蘇悲黎
元之塗炭必將嘗膽誓使然臍不有殷憂何以啟中興
之盛業不有患難何以彰撥亂之英哲步自邠邠至于

朔漠撫巡城邑招致甲兵詔命俯臨三讓而登九五師
徒走集一呼而踰百萬設壇拜將虛左迎師臨朝有怵
惕之容率土下哀痛之詔六軍之號令既肅萬人之賞
罰且明湯火不辭矢石何懼及清秋戒節太白方高爰
整軍容順乎殺氣恭行天罰掃彼妖氛千里貔虎之營
百里龍蛇之陣沸若雲海聚如雪山壘揭終峯塹迴渭
水闌軍聲而丘陵簸盪煬兵氣而天地晦冥蠢茲亮徒
猶敢旅拒鼓譟白刃來聚犬羊之群旗靡黃塵旋就鯨

鯢之戮渠魁不漏噍類無遺枝梧者面縛中軍顛背者
頭懸後殿敗符融於肥水自可銘功破王邑於崑陽未
云快意遂封尸於京觀旋振旅於王城啟闢千門掃除
九陌拔羶腥於宮闕洗毒螫於閭閻耆艾歡迎久思周
德衣冠雨泣還覩漢儀謳吟變噢咻之聲氣象回嚴凝
之慘廓丹霄以瞻羽衛肅黃道而復鑒輿正寶位於北
辰道光主鬯迎上皇於西蜀歡展奉親永惟宗社之靈
實荷乾坤之慶臣忝陪宗室喜萬恒情無任踴躍歡抃

之至謹奉表陳賀以聞

爲江淮都統使賀田神功平劉展表

獨孤及
上元二年

臣某言得田神功等狀稱官軍以正月二十六日過江
大破賊衆擒元惡於蒜山之下凶殘撲滅江介無事臣
某誠歡誠喜頓首頓首臣聞四時成歲秋實集作爲司殺

聖人則之以作五兵蓋姦宄寇賊或乘釁而起干戈弧
矢亦有時而動自陛下率遏亂略再造區宇櫓槍旬始

竹破瓦解蕞爾狂狡敢干天誅作爲豕虵荐食江漢乃

誣矯我詔

集作天

命攘竊我王師暴殄我城邑俶擾我邊

鄙荆吳之人若墜泉谷萬姓業業云我

集作奔走

無所陛下

神聰不測睿算無方將欲擒之必固縱之先侈其心而

厚其毒然後制勝兩楹之下授略千里之外使神功等

一戰而陷陣甫戰而逐北三戰而擒其渠魁繫頸以索

覆巢傾卵

集作子

刮野掃地如刈風之破駭浪嚴霜之墜

集作

落葉浹辰之內平陽州定淮南下東方收三吳流

亡者復故業塗炭者返壽域扇以皇風與之更始遂令
東土耆舊復見漢官威儀非陛下乃武乃文之洪烈日
用不知之玄化孰能陰騭聖功如此神集作其速臣無任
慶抃之至

爲江淮都統使奏破劉展兵捷書表

前

人

上元二年

臣聞聖人之生不能使大盜不起故唐虞集作堯之代時

則有四凶之集作在列王制所以誅不恪討不庭小者市朝

大者原野姦宄草竊何代無之劉辰包藏禍心爲日久

矣

集作
固久

敢恣姦慝乘間阻兵長驅凶徒掩臣未備以偽

言亂衆謂天命在已於是有承食淮泗鯨吞荆楚

集作
吳

之心使黎庶播越人神憤怒臣職司靖難敢不戮力將

集作
當

憑廟略以殄寇讐謹遣副使少府少監攝侍御史

臣李藏用屯兵杭州伺隙進討且分據隘害以遏其唐

突賊衆狃于初役驕舞輕脫

集作師
輕而驕

不虞我軍能折其

銳也乃以今月三日使其偽將軍張翰朱德裕

集作法
雲一作

德等領步兵

集作卒

七千馬兵六百徑入杭州東門焚燒

間間鼓譟而進藏用引其精卒設伏險

集作於

途羸師張

之使入死地然後整堂堂之陣以薄其壘使左廂兵馬

使前澤州長史李澄爲左軍左第

集作弟字

一將張巖光先

鋒將李強李陵等佐之都押衙高幹爲右軍左押衙楊

履和都虞候魏守寂佐之左第

集作弟字

二將皇甫山栖左

三將梁朝康承寂左四將吳季之李楚玉顏光胤等督

遊軍之騎以彌縫其闕表裏合戰奇正夾攻以將帥之

餘勇因黎元之積憤奮皆敢死登必爭先赤羽交而三
軍風生金鼓鳴而萬夫氣作自邠至午覆而敗之神扶
電掃雷落山破噍類無餘隻輪莫反鋒鏑之血朱殷長
江甲齊崇山尸作京觀實賴陛下聰明齊聖與日月合照
故能慮圖發於罇俎而威靈加於遠方使臣等盡敵如
拾芥成功如抵集作掌惡氣沴褻掃蕩無日海隅蒼生
比屋何幸無任慶快之至

爲江東節度使奏破餘姚草賊龔厲捷書表

前人

臣聞皇天分時秋爲司殺王者立極兵以禁暴唐虞有

共工三苗

集作苗人

之患殷周有鬼方昆夷之戰蓋蠻夷猾

夏自古有之自頃胡寇作逆吳越震恐龔厲父子乘間

起兵劫明州之人畧餘姚之地負隘

後篇作險集作阻

海口憑

陵江干蟻聚偷安蠶食取

集作分

給屬王師北伐未遑南

征迨茲二年

集作春

侵掠益甚將擬得

集作復

東甌故地窺

南越僭跡邊邑黎庶爲之騷然臣方荷推轂之寄懷盡

敵之計思所以扶乘天威圖制遠略料其貪而無整勇

而無剛鳥散獸聚不足當堂堂之陣山潛海

後篇作水

匿不

足用桓桓之師難以力制易以計滅臣遂遣軍將潘景

蘭領輜馱數十輩偽爲商旅傍山谷往來以餌之又遣

軍將呂道光領陌

集作相

刀手一百人取其便道爲伏以

待之遣軍將左璋率弩手一百五十人爲左翼軍將

後篇

作將軍

余能變率弩手一百五十人爲右翼皆三吳良家

百越勁卒爭賢餘勇樂於公戰蓬頭突鬚炎

集作效

駭火

烈相爲輔車當

集作夾

敵之路又遣軍將張思覽率陌

集作相

刀手二

集作一

百人爲中軍操中權之制以節其進退以

三月二十九日至青煙洞口果如臣策賊遂出山先者

遇伏鼓噪合戰於是奇正

後篇作兵

畢舉四軍夾攻賊衆奪

氣不知所守鳴鞀雷動飛鏑雨集轉戰數

集作四

十里殺

其三百餘人龔厲尚稽天誅且偷晷刻收合餘燼八九

十人更登高岡背勇借一

集作勢

張思覽等連弩並

集作亂

發引軍合圍天聲揚而勇士勵銳氣作而妖星隕遂斬

元亮父子擒其妻孥餘黨僵仆原隰脂膏草莽猶恐蔣
潢驚薈尚有伏姦遂攬山搜谷刮野掃地傾其巢窟返
旆而旋累載逋誅一朝撲滅非陛下聖謨神策與天合

契制勝兩楹加威

後篇作威加

四海則安能剪豺狼如拉朽

掃欃槍

後篇作同

拾芥使吳越又安江漢澄廓臣授鉞奉

幾覩茲

後篇作同

成功無任慶抃之至謹差攝福州泉州府

別將左璋奉捷書以聞并齎逆賊父子頭奉獻伏望

後篇作請

懸之藁街以示百姓其餘首級於當州梟示訖所獲賊

物各令分賞將士器械官收山海餘妖自取誅滅既非
強敵不足叙功謹錄奏聞

此篇又見六百八十四卷今已削去

賀袁倬破賊表

臣某等言臣等伏見河南副元帥行軍司馬太子右庶
子兼御史中丞袁倬露布奏今年五月十七日破石埭
城賊方清并降烏石山賊陳莊等徒黨二萬五千五百
人者臣聞聖人之生不能使大盜不起故唐虞之代時

則有三苗之師姦宄草竊爲患舊矣山賊方清等最爾
狂狡敢干天誅聚輕剽之徒謂險遠可恃作爲蛇豕以
荐食勾吳乃有跨據大江吞噬東土之計七州之地人
罷物敝

集作耕織

百姓業業全活無所陞下方銳志於偃武

不得已而用師乃命將授略使先勝後戰故倭等役不
再舉而用有成績巢窟皆傾俾無遺類詿誤之輩得返
故業汙俗更始流人汙康此三代之舉也非陛下齊聖
格天文思柔遠豈能底綏盜亂如此其速臣等幸覩成

功不勝大慶臣無任抃躍之至

文苑英華卷五百六十六

欽定四庫全書

文苑英華卷五百六十七

宋 李昉等 編

賀捷二

爲百寮賀僕固懷恩死并諸道破賊表一首

爲崔大夫賀破吐蕃表一首

賀郭子儀破吐蕃表一首

賀擒周智光表一首

賀劔南破西蕃表一首

賀破山南賊表一首

爲崔中丞賀討田承嗣表一首

賀張獻恭破賊表一首

賀收涇州表一首

賀破賊表一首

賀破吐蕃表一首

賀劍南奏破吐蕃表一首

中書門下賀雲南軍破吐蕃劍山保定城表一首

中書門下賀元誼李文通出洛州城表一首

中書門下賀汴州擒李迺表一首

中書門下賀靈武破吐蕃表一首

中書門下賀蔡州破賊表一首

賀蔡州破賊表一首 賀靈武破吐蕃表一首

爲百寮賀僕固懷恩死并諸道破賊表

代宗

闕名

永泰元年

臣某等言臣伏聞逆賊僕固懷恩以去月九日死於靈州鳴沙縣又見成德軍節度使李寶臣露布斬逆賊蔚

州刺史曹楚王并破党項部落收諸蕃漢官兵

一作捷及

百姓等三萬餘衆又邠寧節度使白孝德破僕固瑒下

兵馬及吐蕃斬首三千級生擒一百九十五人獲馬八

百疋兼鳳翔節度使李抱玉亦破吐蕃羗渾等三千餘

衆收其軍資器械不可勝數者臣聞積德者天之所啟

反道者鬼得而誅逆賊懷恩者羣衆雜種出身微賤陞

下以其久經驅策嘗立功勲任以樞機

一作中樞升之上將

而豺狼其性梟獍其

一作爲

心連結西蕃因依北虜大爲

人患二年於茲謂旅拒可以偷生猖狂可以集事曾不知逆天暴物其惡貫盈故王師未加而元亮自斃又曹楚王去順効逆與之連衡更唱迭和同爲不道李寶臣恭行天罰遂戮鯨鯢其餘吐蕃之兵羗渾之旅或毆役邠土或陵逼鳳翔白孝德陷之於前李抱玉破之於後既已剪其兩翼方且覆其全軍信宿一作聞非之間數道皆捷彼進無所入退無所從殄掃妖羣指期非遠臣歷考近事因知天意自祿山開釁思明亂常迄于懷恩三凶

繼跡始雖俶擾旋見敗亡社稷危而復安天地否而重泰足明皇穹保佑厯數延長卜年之慶永代無極臣等幸逢昌運忝列朝行慶躍之誠倍萬恒品無任歡抃之至

爲崔大夫賀破吐蕃表

代宗

浩虛舟

永泰元年

臣某言伏見關內河東副元帥朔方節度使司徒兼中書令汾陽郡王郭子儀八月日奏狀今日日先軍李懷光於監州界大破吐蕃及吐谷渾賊一萬餘衆獲馬六

千七百五十疋牛羊器械未知定數者臣聞戎狄無厭
厚將自斃完殘不革舉必生擒惟此犬羊屢侵壇場陛
下頃雖遣將猶命緩追冀承含育之恩以變貪婪之性
今乃先時入塞乘間犯邊鬼得而誅人皆自戰偏師暫
出舉衆大奔係彼牛馬獲其生級數逾萬計威懾四夷
陛下神化無方聖功潛被資於秘畧成此殊勲臣承恩
入朝次行分陝雖捷書傳慶已竊抃於道一作途中而賀
表陳誠願先馳於闕下無任之至

賀郭子儀破吐蕃表

代宗

于

邵

永泰元年

臣某言今日吳承倩至奉宣進止示臣關內河東副元帥司徒兼中書令汾陽王郭子儀奏捷狀李懷光於監州界積石川大破吐蕃一萬餘衆生擒斬首共六千餘級獲牛馬及器械不可勝數者伏以聖畧遠加制勝前定神功不測告捷如期吐蕃忘國厚恩歲犯邊境陛下料其進退知其無策親以規模授於諸將以鹽夏之路地曠人稀嘗語臣曰此賊秋中必來擾鹽夏今覩成擒

之處果於所料之中俘馘既多羊馬甚衆此皆宸心懸
照不差毫髮天威遠被克壯師徒遂令智勇雲起妖氛
電掃合符聖斷有此豐功予儀狀云又計日追蹤必當
再捷者臣以蕃醜久逋聖誅從此氣衰必當瓦解坐視
無外之慶載美即叙之勲罷柝可期戢戈有望親承睿
筭忽驗於今奉覩戎捷不勝慶快之至

賀擒周智光表

代宗

獨孤受

永泰二年

臣等言臣聞征而無戰者王者之師也將而必誅者春

秋之義也臣伏見周智光傲很頑虐昏迷猖狡

集作狂

敢

專生殺之威以慢王度崇飾姦慝之志自干天誅陛下

謂罪在己躬視人如子永言式遏之義不得已而用師

而將纔受鉞兵未血刃已梟元惡之首載安舊污之俗

昔漢征黥布望塵

集作陣

而憂殷伐鬼方積年乃克豈若

陛下朝命將帥夕殲渠魁制勝神速從古未有臣等不

勝慶快之至

賀劔南破西蕃表

代宗

常 袞

大曆十年

臣某言今日伏見劔南西川節度使崔寧所奏露布十一月七日於劔南大破吐蕃斬首八千五百級生擒九百四十二人獲馬牛器械一千萬計者陛下以西戎負恩連歲設備近興武旅遠鑠王師故隴上或虞邛南每捷事同符契謀動鬼神凡在臣庶不勝慶快伏以西蜀一隅犬戎乘隙聖謀潛運藩帥龔行以我同力出其不意故得邊兵無遺鏃之費狂寇有一作致興尸之凶名王首將既充俘馘要塞堅城亦入封守神武之德莫測掃

除之勢足徵天聲一臨風動萬國則方隅不擾候我綏懷夷夏大同期於指掌臣等覩茲大捷愧乏嘉謀慶躍之誠實倍恒品

賀破山南賊表

代宗

臣某言中使某至示臣山南西道露布破吐蕃高安堡五百人又生擒堡使等七人又破急援兵馬二千餘人者大獲帥長驅其畜牧焚其資儲夷其堡隊獲覩慶捷喜倍一作萬恒情臣伏以秋成以來羣帥宣力陛下皆先

授方畧合如符契以蕃醜東寇猶窺疆場受命獻恭掩
征巢穴允膺密旨精擇奇鋒行於險中出其料外遂使
恃固之壘遽復于隍將領之渠盡衿其甲猶不悔禍更
招援軍以犬羊恃衆之羣當貔虎輕齎之旅雖終日猶
鬪殲耗相仍而乘夕盡逃覆亡不暇聖謀方舉西候遂
寧神算既行北郊以靖遠周萬里之外甫料四夷之情
中詔是闕所征皆捷苟承成命皆可指期故邛道拜章
於前漢池拜章於後復留睿畧更布新書軍中皆必勝之

師天下無不賓之虜臣幸叅樞近更乏嘉猷拜舞失容以慙以賀

爲崔中丞賀討田承嗣表

代宗

常袞

大歷十一年

臣某言中使某至奉宣某月日敕承嗣本輔逆臣罪當三夷陛下垂包荒之德開自新之路假以台袞冀其悛革豈謂豺狼之心飽而增兇動搖隣境慢易君命天下臣子雖扼腕攘臂願食其肉畏懼陛下不敢自發今陛下殷然震雷霆之怒下誅購之令戴髮橫目莫不憤激

臣受國恩守在遠藩不得驅策駕蹇列於將臣巨猾之首竟爲他斷撫劔慙恥心愧馳越臣又知鯨鯢既盡蜂蠆自滅陛下垂衣裳以臨萬邦無爲之政行同一作繼大舜無任慶快感憤之至

賀張獻恭破賊表

代宗

臣某言今月中使某至伏蒙聖恩宣示南山西道節度使檢校工部尚書張獻恭所奏露布破岷州吐蕃十萬餘衆生擒百餘人并獲牛馬及燒焚賊倉庫甲仗並盡

者伏以吐蕃背恩負約屢擾邊陲惡稔禍盈自招喪敗
聖謀潛運尅捷相仍自秋已來制勝非一項則收功朔
北今又獻凱山南皆陛下指受規模尅期進取遂令啣
命之將感義之徒伏順爭先奉詞掩襲未鼓而收城壘
既戰而殲寇戎策備火攻威同電掃迴軍乘勝又破柘
川殺獲追擒不可勝數嘯聚之黨今已戮除噍類之餘
自當殄滅廓清右地計日可期斯實皇威遠覃睿畧先
定動罔遺策舉必有功臣謬踐台陛親承睿筭無任踴

躍之至

賀收涇州表

德宗

臣某言中使王開諫李重芝等至伏奉敕旨送吐火羅
王子并曹義臣家口共四十四人配漳泉等州安置伏
聞大破兗醜收復涇州梟斬帥劉元等傳送闕下餘黨
悉降西陲底定凡在臣庶不勝慶快臣聞聖人有作神
契必先用彰睿謀小有邊患以威天下大告武成因茲
斬效疑罔不率俾伏惟聖神文武皇帝陛下德合天地

明罰以法雷霆道符炎黃有征以懲姦宄蠢茲狂狡敢
拒封圻梟獍之心不知恩愛豺狼之性輒肆傷殘聖慈以
玄造曲成神武不殺特寬嚴旨頻許自新益用恣睢竟
無悛革然夏后之征扈氏召六卿以恭行周文之伐密
人示萬邦以整旅咸在侯甸之內亦効訓誓之勤於是
我伐用張親授經畧而執迷不復雖困猶闢蹙假游氛
尚稽靈誅皇赫斯怒天威震耀簡車馬以大閱命將帥
以長驅飛舞梯衝瞰臨壁壘克徒悚慄義士激昂梟懸

渠魁檻送支黨上以告清廟下以布遐方人神豁憤朝
野大慶百二之塞外虞解嚴十萬之師餘勇可息則日
月所照敢不來庭戎夏大同期於指掌臣謬承重寄喜
萬恒情無任慶躍之至謹奉表陳賀以聞

賀破賊表

德宗

于邵

臣某言臣聞春生秋殺天之令也撫順討逆國之教也
故王者上法震耀下脩典刑雖當垂拱之朝亦整干戈
之用伏見今月十日神策行營節度使尚可孤破藍田

賊保生擒賊偽署御史大夫仇敬忠斬獲共二千餘人
者初從摩壘旋即合圍因乘破竹之威不漏枯池之網
中賀伏惟皇帝陛下聲教以文暢禍亂以武戮奄有華
夏光臨統厯日者蕞爾朱泚怙亂涇原腥穢宮闕僭賊
神器陰連叛將竊緩輿屍實由逆賊仇忠敬等姦亮相
資狡惡爲事因山據嶮欲抗雷霆之誅積粟稅一作挽芻
冀延晷刻之命殊不知天威不遠睿筭何逃未終瘝狗
之狂已觸駭駭之勢餘亮奪魄義衆增威掃氛侵於順

風復京師於不日臣謬兼統帥濫一作久總禁戎矢石不親虛當坐制之地克渠尚在終決前驅之心無任慶快之至

賀破吐蕃表

德宗

齊 映

臣某言伏聞南蠻以六月某日大破吐蕃弄視等城擒戮俘獲不可勝計者臣聞德之所綏在遠咸服義之所棄雖暴必亡蠢茲犬戎敢肆兇戾久稽天討時動邊塵人神共讐夷夏同憤遂使南蠻奮旅仗義爭先覆其保

障之恃奪彼肥饒之地斬馘萬級俘計千羣揚天聲於
區外正王畧於殊俗自非陛下道超帝圖化協神用武
先七德守在四夷安得使百蠻稽服潛被聲教始左社
以請吏俄倒戈而効誠捨其唇齒之資爲我爪牙之用
雖書稱即叙詩美來威方之聖功彼有慙德臣謬膺朝
寄待位東土不獲隨例稱慶闕庭抃躍之誠倍萬恒品
不勝慶快之至

賀劔南奏破吐蕃表

德宗

令狐楚

臣某言當道進奏院狀報六月某日劔南節度使韋臯
狀奏破吐蕃五千餘衆生擒大酋官七人陣上殺一百
五十餘人收獲牛馬四百餘頭足器械一千五百餘事
者吉語遠及歡聲相接中賀臣聞順實臣道伏頭者至
柔而全禮爲天經無禮者雖衆必敗陛下君臨萬國天
覆兆人恩覃于幽微澤及乎荒遠蠢茲蕃醜假息西陲
惟天地含弘之心未能剪滅以豺狼貪戾之性輒欲一作
肆陸梁爰整其師不攻而取此皆降虜畧於天上頌明

謀於閫外制士之死命得人之歡心所以殪戎如羊破虜如蝨毆彼牛馬獲其侯王威加于殊域武暢于羣動自然赤山之壤可蹈清海之波可涉必當封土刻石以垂天聲戎臣司武獲覩其慶不勝歡抃之至

中書門下賀雲南軍破吐蕃劍山保定城表

德宗

權德輿

臣某言伏見劍南西川節度使某官某所奏兵馬使宋晃前月十八日與雲南軍合勢攻破吐蕃劍山保定城

當日斬城使者伏以聲教所被遐邇大同蠢茲西戎尚有遺類或犯亭鄣且稽靈誅陛下睿筭無窮天威遠震以夷裔感恩之衆佐藩隅制勝之臣取以多方累獻戎捷事皆前定必稟聖謀

集作謨

斬將搴旗出於料外堅城

便地盡落穀中通荒服會朝之途絕餘孽窺覲之隙奉威懷之命以律而臧兼夷夏之師在和而克此皆陛下神武潛運妖氛永清由是成擒自當盡敵臣等謬當樞近媿乏廟謀幸覩成功不勝大慶無任欣抃之至謹奉

表陳賀以聞

貞元元年十一月三日

中書門下賀元誼李文通出洛州城表

德宗

前人

臣某言臣等今日面奉進止元誼李文通等蒙恩宥過以今月七日將領將士出洛州城者伏惟皇帝陛下聖神之化懷保元元仁洽好生感深格物誼等列於守將本以忠勞師旅之間失於慮始蒼黃之際自謂匪人士吏危疑謀猷回遁陛下以震耀所及殺傷則多曲成以

誘其衷持久以通其變愀然軫念不忍致誅待以初心
許之遷善指其開壁率衆來朝實賴亭毒之恩再全臣
子之節宥茲一眚昭示萬方睿慈所弘動植知幸臣等
虛薄備位台司愧無調鼎之能獲覩止戈之慶無任欣
抃踴躍之至謹奉表陳賀以聞

貞元十二年
正月十三日

中書門下賀汴州擒李迺表

德宗

臣某言中使某乙奉宣進止汴州以今月三日擒送李
迺軍州並已寧帖者伏以聖德含弘在宥天下而匪人

醜類自抵刑章李廼本以庸微謬從軍校潛懷狂戾輒
擾師徒乘其疾病坐邀職秩怙亂以逞志專戮以作威
人思納忠義不同惡俄就械繫一方晏然雖梟獍之心
暫求假息而鷹鷂之逐曾不崇朝衆情交欣以待朝旨
陛下命將相之重撫按是邦明書罪人且示輕典成命
方下浚郊以清聖謨炳然若合符契足使義士勵節貪
夫革心稟化畏威無有遠近集作臣等繆居台鉉每奉
德音愧乏嘉猷以承睿畧無任懽忻慶幸之至謹奉表

陳賀以聞

貞元十二年
七月九日

中書門下賀靈武破吐蕃表

臣某等言臣等今日面奉德音靈武大破吐蕃擒生斬
將者伏以睿謀武經陰陽上畧兵符所授攻戰多方蠱
茲犬羊尚勞燿燧羣師稟命中權戒嚴犄角相因初設
險於三覆竒正合發俄獻功於七擒數箇渠之首級積
戎械於亭候勝氣餘勇鼓行無前即叙可期有征斯在
臣等繆居樞掖莫效消埃每承以律之貞空荷止戈之

運無任慶快踴躍之至謹奉表陳賀以聞

貞元十四年十二月二十

九日

中書門下賀蔡州破賊表

德宗

臣某等言伏奉宣示蔡州行營招討使韓全義所奏云
四月二十七日於逆賊吳少誠界破賊驪子及馬步軍
三千餘人賊弟吳少陽棄衆奔遁者伏惟陛下聖神廣
運丕冒萬方而顛越匪彝自蹈鋒刃德音累降曉告不
悛禁暴安人酌於軍志命師授律發於宸心整旅有嚴

拊循決勝據便地以三覆分銳師而九攻村官突騎奮
勵精勇啟行所及莫敢枝梧奔北之徒自相蹈藉咸謀
克壯殺獲斯多更俟便宜續圖攻取蒙輪超乘靡不賈
餘長轂鉤援期於盡殪此皆睿筭前定純臣協心佇清
淮瀆以慶天下臣等謬居樞近喜倍集作萬恒情無任欣
抃踴躍之至謹奉表陳賀以聞

貞元十六年
五月四日

賀蔡州破賊表

德宗

張仲素

臣某言伏聞蔡州營田招討

一作招
討行營

韓全義今月某日

大破賊軍斬首擒生其數至廣臣某中賀臣聞天覆至大負
慝者必降雷電之討君恩至重失節者須示斧鉞之誅
賊臣吳少誠輒因將帥之權遂肆豺狼之性聖恩含忍
久示招携敢固執迷未即歸罪今全義親承睿旨虔稟
聖謨整師臨境羣兇授首梟斬元惡計日可期廓清淮
瀆在茲一舉臣謬忝地官之職情同率土之歡欣快之
誠倍百常品無任踴躍之至

賀靈武破吐蕃表

德宗

令狐楚

臣某言臣得朔方節度使李樂牒稱十一月二十日大
破吐蕃者千里喧傳三軍快抃臣某誠歡誠喜頓首頓
首臣聞天生四夷用別荒服國有二柄誰能去兵伏惟
陛下臣妾兆人庭衢六合溟波靜息車軌混同萬里清
平三分底定而吐蕃羶臊醜類狂狡陰計乘陵凍草妄
竊邊疆相鼠無牙安能穿屋羝羊羸角徒欲觸藩是以
神聖啟其將心忠勇成於士力兵既落於天上虜乃一作
果陷於穀中箝口之馬僨車而繫者千蹄一作辘轳之
辘轳一作辘轳

人爲俘輿屍者萬指降旗載路棄甲滿野遙知水亦坐
想風腥此皆宗祖儲靈朝廷決策破碎戎膽振騰天威
凡百人臣不勝踊躍臣某未申絲髮謬總旗旌欣歡憤
激倍萬恒品所守有限不獲稱慶

此表合在本卷令狐楚賀劔南吐蕃之後元誤入
六百三十七卷賀狀內今移附卷末

文苑英華卷五百六十七